

Deporte Local

Brazil Taekwondo Stichting a cumpli 20 aña di existencia dia 18 di Augustus 2014

ORANJESTAD (AAN)--- 20 aña pasa Alberto Klabér kende a caba su carera di Top Sport Taekwondo na Hulanda a funda Savaneta Taekwondo Stichting. E nomber Savaneta Taekwondo Stichting a bin door di cu e lesnan tabata wordo duna e tempo ey na Marinierskazerne na Savaneta. Alberto Klabér a bin Aruba na luna di November na aña 1993 y Alberto Klabér a presenta un plan pa engrandecé e Taekwondo aki na Aruba y esaki no a cay den bon tera cerca e directiva di e tempo ey.

Alberto Klabér a acerca sr. Jose Chaco Cornelio pa asina organisa un campeonato na luna di Februari e tempo ey na Club Caiquetio na unda cu tabata tin 108 participante. Despues di esaki Alberto Klabér no a para keto y a busca un lugar pa asina duna les di Taekwondo na e atletanan di Aruba pa asina duna bek un parti di lo cual cu a wordo duna na Alberto

Klabér tempo cu e tabata den seleccion di Hulanda den e añanan 1988-1993. E hoben atleta cu hopi experencia y ambicion tabata na top den su carera di Taekwondo y tabata masha determina pa duna les di Taekwondo na unda cu ta. Asina Alberto Klabér a logra di haya e zaal di Marinierskazerne y a funda e nomber Savaneta Taekwondo Stichting y e portanan a habri pa un y tur. Aki ta na unda cu Aischal van der Linde, Stuart Smit y Willy Willems jr. a cuminsa nan carera di Taekwondo y te cu awe ta atletanan elite di Aruba. Alberto Klabér a logra trece ex campeón Mundial sr. Henk Meijer na Aruba pa asina duna clinica di Taekwondo na e atletanan di Aruba. Durante e añanan Savaneta Taekwondo Stichting tabata organisa 4 campeonato pa aña (Lenor Taekwondo Cup, Adidas Taekwondo Cup, Sbarro Taekwondo Cup, Best of the Best Powerade Taekwondo

Cup).

Tabata tin hopi atleta di caliber cu a cuminsa forma na Aruba. Minister di Deporte e tempo ey sra. Lili Beke Martinez no tabata falta niun actividad di Savaneta Taekwondo Stichting. Sra. Lili Beke Martinez tabata yega Marinierskazerne sin invitacion mes. No por papia di esaki awendia. Na aña 1998 Alberto Klabér a yama sr. Willy Willems pa bise si e por duna les awe, mi ta yega mas laat. Willy Willems nunca mas a mira Alberto Klabér. Alberto Klabér a desaparece for di Mapa te cu na aña 2008 na unda cu Willy Willems a yama Alberto Klabér pa bin tuma e scol bek over, sino e ta bay wordo cera. Alberto Klabér a bisa cu e ta tume over bek bao di e condicion cu e lo busca un trainer di afo pa bin duna les. A logra haya un Mexicano cu a keda 1 luna so. Aki ta na unda cu Alberto Klabér a keda den buskeda di un trainer pa bin duna les y no a logra di haya un. Asina Alberto Klabér a cuminsa duna les bek na Brazil Taekwondo Stichting cu a haya e nomber di Willy Willems kende a muda for di Savaneta pa Brazil. Alberto Klabér a cuminsa wak entre e atletanan cu tabata tin pa wak kende lo por sigui duna les.

Aki ta unda cu Alberto Klabér a papia cu Clifford Rasmijn kende semper tabata tey tur dia pa e cuminsa duna les. Brazil Taekwondo Stichting a cuminsa trece trainers for di Venezuela, Suriname, Hulanda y Merca pa duna les. Russell Beneby kende ta e coach asistente di Merca a duna Clifford Rasmijn su certificado di trainer. Clifford Rasmijn a keda masha contento y despues di a gana varios premio na Suriname a bin cu e lema di "Train Hard Fight Smart" Clifford Rasmijn a tuma dunamento di les na pecho y Brazil Taekwondo Stichting a sigui crece den atletanan dinamico y na unda cu Brazil Taekwondo Stichting biaha ta bin bek cu premionan di primera clase. Asina Brazil Taekwondo Stichting a sigui crece y awe ta conta cu 5 faha preto caba y 1 atleta cu a sali atleta di aña aki na Aruba cu ta Hakeem Lowe. Hakeem Lowe ta un di e atletanan cu ta sacando cara di Aruba na grandi internacionalmente



den su categoria. Brazil Taekwondo Stichting ta na unda cu ta forma e mihor atletanan di Aruba. Despues cu Alberto Klabér a drenta e Hall of Fame na Las Vegas cu no tabata e meta di mas grandi di Alberto Klabér su logronan, pasobra ainda Alberto Klabér ta trahando ariba mas di su metanan.

Den tur e premionan cu Alberto Klabér a logra durante di su tempo den e seleccion di Hulanda, e pelea contra di Korea tabata esun di mas bunita cu Alberto Klabér a logra di gana pa Hulanda y cu te cu dia di awe te den su mente. Alberto Klabér a logra di gana varios premionan den su tempo como atleta. Alberto Klabér semper tin e tendencia di huy for di Brazil Taekwondo Stichting y kier sigui cu su hobby di saca potret di Taekwondo, un hobby cu ta pone Alberto Klabér biaha pa campeonato internacional djis pa saca potret pa asina haya e mihor shotnan. Awor nos por wak atras despues di 20 aña cu Brazil Taekwondo Stichting tin un directiva dinamico na unda cu ta organisa car wash y BBQ pa asina e atletanan por biaha representando Aruba na grandi. Brazil Taekwondo Stichting awor

ta conta cu su mesun bus cu ta busca e atletanan for di nan cas y hibanan bek cas despues di training.

Brazil Taekwondo Stichting ta conta cu un directiva chikito cu ta consisti di Alberto Klabér, Presidente, Jervis Lowe, Vice Presidente. Jeritza Arends, Penningsmeester, Danica Delamore, Secretaria y Antonio Geerman, Bestuurslid. Un team cu ta traha na bienestar di e atletanan na unda cu e atletanan ta central. E ultimo 3 añanan Brazil Taekwondo Stichting ta traha calender pa recauda fondo pa e atletanan. Brazil Taekwondo Stichting tin como meta mas grandi pa e atletanan na aña 2015, bay biaha pa Europa pa 3 siman di camptraining. Alberto Klabér ta gradici tur esnan cu semper a kere den e plan di Brazil Taekwondo Stichting y cu semper tey pa yuda of duna un man. Un pabien grandi ta bay na Brazil Taekwondo Stichting y su team di Train Hard Fight Smart kendenan ta preparando pa e campeonato internacional cu tin nan dilanti cu e wowo ariba e TK5 na Corsou na unda cu Clifford Rasmijn tin dos aña consecutivo ta gana esaki hunto cu e team.

